

INUIT ATAQATIGIIT INATSISARTUNI



19. juni 2025

UKA2025/93

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Utoqqarnut inatsimmik ataatsimik pilersitsisoqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mariane Paviasen Jensen, Inuit Ataqatigiit)

Tunngavilersuut:

Ullumikkut utoqqartartinnut atugassarititaasut imaaliallaannaq inatsisitigut sinaakkutinik peqannginnera annertuumik atuisunut eqquinerluppoq, qinigaaffik kingulleq utoqqarnut inatsimmik pilersitsisoqarnissaannik siunnersuuteqarnera ingerlannikuuara ajoraluartumilli taamanikkut naalakkersuisuusup suliaq naammassinngitsoorlugu qinigaaffik naavoq. Taamaattumik maannangaaq siunnersuut qaqeqqittariaqarlugu misigisimavunga isumaqarama pingaaruteqarluinnartuusooq aammalu pilersinneqartariaqartoq.

Utoqqartatta atugarisaannik pitsanngorsaannisaq pisarialerujussuuvoq, minnerunngitsumillu utoqqartatta ullumikkorniit ajornannginnerusumik imminerminnut inatsit atuuttunut tunngasuni pisariitsumik ujaasisinnaanissaat eqqortumillu sullinneqarnerminnik misissuisinnaanissaat pisariaqartipparput.

Utoqqartatta ullumikkut nalorninartumi inissittarnerat qaangerneqartariaqarpoq assersuutigalugu peqqinnissaqarfiup imaluunniit inuninnik isumaginnittoqarfiup suna qanorlu ilisukkut isumagisussaanaeraat nalornissutaalersarpoq, taamaalilluni utoqqartatsinnut atugarissaarnerulaarfigisinnaasaraluaminni pisortaqarfinnut saaffiginnittaqattaarnerit ingerlalersinnaasarput piffissarlu ilaanni sivisooq atorneqartarluni akisussaaffiup qanorlu sullinneqarnissamut pisinnaatitaaffinnik eqqortumik sullinneqarnissaq anguniarneqartillugu, taamatut atugassaqaqtitsinerput minnerpaamilluunniit akuersaarneqarsinnaanngilaq.

Allaammi utoqqartatta aqqusaarsinnaasarpaat ikiortissarsioraluarneminni nukinnik atuingaatsiareeraluarlutik toqukkut qimagussinnaasunik, utoqqaat ilaasa pisinnaatitaaffitsik atorniaraluarnarani saaffiginnittaqattaarnerit inuunerup nalituneruneranik piffissallu allatut atorsinnaagaluarnanut atorsinnaagaluarlugu ikiortissarsiornermut atuiffigisariaqartarpaat, ilaatigullu tusarsaasarluni ikiortariaqaraluarluni pisariaqartitsigaluarluni sullinneqarnertik nalorninarpallaarlunilu kigaappallaarnera pissutigalugu sullinneqarniarnertik sussakkiigiinnartariaqarsimallugu.

Ilaqutariippassuit utoqqartamik atugarissaarnerunissaannut ikiuullutik suliniuteqartarput taakkunungaluk qujamasunnartuuvoq, taamaattorli aamma piffissaq ilaqutariittut nuannisarfissatut atorfissaqartinneqartoq

atorluarnerorusukkaluarnerani uggnartuusarpoq pisortaqaarfinnut saaffiginnittaqattaartariaqarnermik piffissap nalituup iluani atuisariaqartarnek.

Siunnersuutip siunertaraa utoqqarnut inatsimmik ataatsimik pilersitsinissaq taamaaliornikkut allaffissornikillisaaneq, atuisunut nalorninaatsumik inatsimmi sorlermi pineqarnerluni nassaarsiorsinnaaneq periarfissaalissaaq, pisinnaatitaaffiillu nalorninaatsumik pissarsiariuminarnerulernerannik kinguneqartussaasaaq. Allaffissornikkut aningaasartuutikillisaataaginnarani piffissamik atuiffiusumik sivikillisaataasumik kinguneqartussaavoq, tamakku tamarmik inuiaqatigiinnut tamanut iluaqutaasussaapput.

Inatsisissatut siunnersuut pingaaruteqaqisoq susassaqtut tassalu utoqqaat peqatigiiffii, utoqqaat illuini najugallit, kommunini utoqqarnut sullissit, inunnik isumaginnittoqarfiit peqqinnissaqarfiillu suleqatiginerisigut suliarineqassasoq, naatsumik oqaatigalugu susassaqtunik peqataatitsilluarnissaq aallaavigalugu inatsisisaq suliarineqassasoq kissaatigaara. Taamatut siunnersuuteqarlunga partiit isumaat tusassallugu, oqallinnerlu torersumik ingerlannissaanik kissaateqarlunga qilanaarpunga.

Pisortanut aningaasatigut allaffissornikkullu kingunerisassai:

Inatsisip saqqummiuteqqinnissaanut nutarterinermut aningaasat 500.000 kr. allaffissornikkut ukiumut ataatsimut atorfillip sulineratut naatsorsuutigineqarpoq.

Namminersortunut aningaasaatigut allaffissornikkullu kingunerisassai:

Soqanngilaq

Innuttaasunut aningaasatigut allaffissornikkullu kingunerisassai:

Aningaasartuutikillineramik kinguneqassaaq.